

Wewe ndiwe chemchemi ya bustani yangu, Kisima cha maji yaliyo hai, Vijito vya Lebanoni viendavyo kasi—Wimbo Ulio Bora 4:15.

Ni kupitia mwingiliano binafsi na ushirika ndipo watu hufikiwa na nguvu ya injili yenye kuokoa. Hawaokolewi kama kundi, lakini kama mtu mmoja mmoja. Mvuto binafsi ni nguvu. Inabidi ufanye kazi pamoja na uwezo wa Kristo, kuinua pale Kristo anapoinua, kutoa kanuni sahihi, na kuzuia maendeleo ya ufisadi wa ulimwengu. Ni kuienza neema ile ambayo Kristo peke Yake anaweza kuitoa. Ni kuinua, kupendezesha maisha na tabia za wengine kwa nguvu ya mfano safi uliounganishwa na imani ya kweli na upendo....

Kupitia katika dhambi, mwanadamu kwa ujumla wake huvurugwa, akili inapotoshwa, mawazo yanaharibiwa; welekevu wa roho hushushwa hadhi. Kuna ukosefu wa dini iliyo safi, ya utakatifu wa moyo. Uweza wa Mungu unaoongoa haujafanya kazi katika kufanyia tabia matengenezo. Nafsi ni dhaifu, na kwa sababu ya upungufu wa nguvu ya kimaadili ya kushinda, imechafuliwa na kudhalilishwa.

Kwa moyo ambao umetakaswa, yote yanabadilishwa. Badiliko la tabia ni ushahidi kwa ulimwengu wa Kristo anayekaa ndani. Roho wa Mungu hutoa maisha mapya ndani ya nafsi, na kuleta mawazo na matamania katika kuyatii mapenzi ya Kristo; na utu wa ndani hufanywa upya kuwa katika mfano wa Mungu. Wanaume na wanawake wadhaifu na wenye kukosea huonesha kwa ulimwengu kwamba uweza wa kukomboa wa neema unaweza kusababisha tabia yenye kasoro kubadilishwa hadi kuwa na tabia linganifu na yenye kuzaa sana.

Moyo unaopokea neno la Mungu si kama dimbwi linalotoa mvuke, si kama birika lililovunjika ambalo hupoteza hazina yake. Ni kama kijito cha mlimani, kinacholishwa na chemchemi zisizokoma, ambazo maji yake ni baridi, yenye kung'aa na huruka kutoka mwamba hadi mwamba, yakiburudisha waliochoka, wenye kiu na wenye kulemewa na mizigo mizito. Ni kama mto unaotiririka kila wakati na kadiri unavyoendelea, unazidi kuwa na kina na kuongezeka upana, hadi maji yake yenye kutoa uhai yasambazwe juu ya dunia yote...

Ndivyo ilivyo kwa mtoto wa kweli wa Mungu. Dini ya Kristo inajidhihirisha yenyewe kama kanuni iliyoenea yenye kujaza nguvu, nguvu ya kiroho, itendayo kazi, iliyo hai. Wakati moyo unapofunguliwa kwa mvuto wa mbingu wa ukweli na upendo, kanuni hizi zitatiririka tena kama vijito jangwani, na kusababisha matunda kuonekana mahali ambapo kwa sasa kuna ukame na uhaba.

Kadiri wale ambao wamesafishwa na kutakaswa kupitia maarifa ya ukweli wa Biblia watakvyojishughulisha kwa moyo wote katika kazi ya kuokoa roho, ndivyo watakuwa kwa kweli harufu ya uzima iletayo uzima. Na kadiri kila siku wanavyokunywa kutoka katika chemchemi isiyokwisha ya neema na maarifa, watagundua kwamba mioyo yao wenyewe imejazwa hata kufurika kwa Roho wa Bwana wao, na kwamba kupitia huduma yao isiyo na ubinafsi wengi wanafaidika kimwili, kiakili na kiroho. Wale waliochoka wanapata nguvu mpya, wagonjwa wanarejeshwa katika afya na wenye mzigo wa dhambi watafarijiwa (Manabii na Wafalme, 18, uk. 159 – 161).